


條櫛鹿堂集

十七

十七

内閣文庫			
番號	漢	17228	
冊數	20 (17)		
函號	圖	48	1



條麗堂集卷之二十七

蒲阪鳳磐張四維著

代郡後學施重光校

誌二

贈文林郎吏科都給事中守拙王公暨配

封太孺人檀氏合葬墓誌銘

太原之王代爲著姓余同年友太僕卿王本道
氏寔太原之忻州人沉毅守道不苟同流俗綽
然有故家風焉初太僕官諫垣會天子推建儲

恩父守拙公贈文林郎吏科都給事中母檀氏
封太孺人時守拙公贈文林十年餘矣比太僕
授今職太孺人就養宦邸以卒太僕乃卜兆忻
西南五十里南張村之高原奉公夫婦柩合葬
焉遂手自爲狀走使蒲坂屬余誌而銘之余覽
狀則蹙然以興諗王氏慶澤所原蓋明德遠矣
按狀公諱鎧字文濟別號守拙世家太原勝國
時徙大同其遷于忻則自六世祖源生清舉人
舉人歷任浙江衢州府同知清生綱壽官綱生

讓由歲貢兩任知縣終都司副斷事讓生堯臣
舉人凡三任知縣綱公高祖讓曾祖堯臣祖也
父聚奎以諸生入貲爲河南都司斷事母楊氏
公生而清穎天性孝讓比知學卽刻苦自勵夜
分不寐深造實踐慨然以遠大自期嘗曰身修
而後萬物可理督責話言皆末也居嘗悲憫時
事究心于經濟欲以范文正之義田爲睦族法
呂氏之鄉約爲善俗法張橫渠井田之議爲治
世法俱畫有成筭較然可行無何以疾卒初公

善唐舉許負之術每引鏡自照輒嘆曰吾有志當世恐年涉三十七八時不及措手爾至是果不爽云公循謹有禮與物無競歿之日州里老穉無不嘆息泣下久之益見思配太孺人檀氏者同郡處士香女也處士娶于劉有女德是生太孺人寔克肖之年十八歸公公遊學四方有大父母父母在堂太孺人謹事之以孝聞性勤儉夙有痼疾少間卽起治事布衣蔬食不喜纂組歿室益窶太孺人上孝養老親歲時得佳

果新菜必先獻之下誨育諸孤勤勤懇懇俾無忘公遺訓故太僕問學夙成敷猷展采卒能究竟公志而休有譽聞則慈教然也公生于弘治壬戌六月三十日卒于嘉靖戊戌五月初八日得年三十有七太孺人生于弘治甲子正月二十二日卒于隆慶辛未九月廿一日得年六十有九子男三人伯治卽太僕由癸丑進士歷任今官娶張氏卒贈孺人繼傅氏仲浩早卒季洛衣巾生娶彭氏女一人適庠生楊思芳孫男五

茂松早卒茂材娶姜氏茂栢聘趙氏治出茂梧
 茂檟洛出孫女一字寧化衛應襲潘潤治出曾
 孫女一茂材出銘曰唯忻有王系出太原儒行
 世修載德則蕃溫溫恭人潛心理窟居衆能謙
 在隱不忽既弘厥志迺不永年芳馨未沫襲于
 遺編貞媛子子矢心皎日茹荼字孤用競厥室
 宣勞于國馳慶于家神相有徵天道靡差臚臚
 南岡有崇者阡我銘不媿鑄在重泉

南京刑部廣西司郎中石溪陳公暨配朱

宜人合葬墓誌銘

嘉靖乙丑余分校禮闈士得今官諭陳君公望
 為舉首則莆秋官大夫石溪先生子也先生以
 經學起家兩魁賢書而公望修其業以顯若合
 左券奕世科名之盛海內所未有焉然先生謝
 事早人以不得究所施為先生憾公望既貴再
 值大慶還先生官已復晉秩朝列大夫業足以
 顯先生而先生卒卒之日天子念公望經幄勞
 特推恩命有司為先生致祭起塚如法而先生

配朱宜人者先先生十年卒至是公望欲並啓其窆與先生合則介書余請銘公望初第時余獲觀先生子舍中恂恂古質一見知其長者心甚誼之故茲于公望之請不辭按狀先生諱言字宜昌別號石溪其徙居莆自唐清遠令公樞始宋有尚書公仁璧僕射公靖並爲名臣明興則叅政公觀以文學受知高皇帝嘗召備顧問未及大用卒觀生鄉進士熊熊三傳爲蓀蓀生愧峯公宣則先生父也母爲黃孺人先生少顯

精力學文譽藉甚初試有司不利氣嶽嶽不少挫嚮往益堅家故貧嘗授徒連州州帥與先生善有持重賄免先生白事者先生叱止之曰貧吾分也吾不能以此自巽敢用巽人其志操如此嘉靖丙午魁省試明年丁未再魁南宮遂成進士大宗伯泰和歐文莊公雅重之請于銓曹以先生爲邑令先生治泰和務伉直行一意有所興除不爲豪右骫法尤恥伺上官指巧爲迎合撫臺某獵賄所部陰屬公爲購書先生陽若

弗喻也者而束書露餽之某大憲謀螫先生先生因引疾謝不任請就教職得浙之湖州湖胡安定公故授徒處也先生至則申約束日切劇諸弟子諸弟子執筴請業前席爲滿間有跼弛不檢者輒跽之堂下譙讓之衆肅然敬憚焉已稍遷國子博士積歲不調會肅皇帝欲爲李都尉立傳政府欲私某子甲太宰建安李公不從竟疏先生名以上於是先生得擢禮部儀制司主事傳李君異時都尉率貴倨驕其師先生獨

抗顏自尊重務示都尉以禮時論以此高之越明年大宰李公以讒被譴政府修宿憾批根及先生謫倅郴州郴故僻公處之怡然無幾微見顏色而職事一切辦治暇則進諸士講藝一如在湖州時會其年與事省闡得今武陵陳中允等六人皆知名士而郴士曾君選輩亦斌斌相繼起人多先生之鑒拔焉已擢知秦州值島夷訐江淮間幕府請餉甚急先生周爰調劑下不殫民力而軍興亦給州有疑獄所淹繫甚衆先

生訊立出之衆驩感若更生尋轉南刑部員外郎晉郎中蓋駸駸達矣竟爲憾者所中用守泰州事坐謗免歸歸三年而公望登第先生喜曰吾志有托矣因營別墅一區名其室曰怡老堂時臥起吟咏其中泊如也蓋優游十五年而卒其卒也正衣冠應對賓客如常一言不及于亂人以為先生素養之徵先生性坦率於人無所德怨亦不以德怨望人而內行尤篤母黃孺人卒諸同產纍纍先生窮年講肄盡以所得資諸

孤費無所私仕則又割奉予之者數矣晚而林居稍稍葺先壟拓祀田敘次家乘若干卷曰以此示子孫令無忘吾孝悌敦睦之行也嗟乎先生本用經術顯不習爲吏以故仕於世多齟齬然其用乃在人倫風教之間視卑卑施于名實末矣要以公望日執經侍人主紹明先生之家學則先生未可謂不遇世也先生受室古田尉受敷女爲朱宜人宜人始歸先生時值姑既歿家落甚至不難脫簪珥以佐朝夕先生既仕宜

人齋用一無所加卽屢起屢躋宜人亦不以其
故自貶斯可以觀宜人已其他懿行具許太史
誌中茲不具論先生正德丁卯七月三十日
卒萬曆丁丑七月二十七日得年七十有一宜
人生正德乙巳閏九月十一日卒隆慶戊辰七
月十三日得年六十子男二長經邦卽公望左
春坊左諭德宜人出娶林氏封孺人次經學側
室何氏出聘蕭氏女五長適庠生黃必輔早卒
次適庠生吳臬皆宜人出次適庠生余澄次許

李治次許方應僖皆何出孫男一翰佐聘方氏
孫女二長適林陞次許鄭淞皆公望出其合葬
在某山之原銘曰人亦有言寸長尺短柄鑿難
投瑕瑜不掩於惟先生含華咀實孔門文學漢
庭經術蘇湖安定國子陽城生平宦蹟太半傳
經白首爲郎孰云膺仕考槃自怡象賢有子後
祿方將長算遽訕帝錫愍恩寵存逮歿誰其祔
之曰惟淑媛隧而相見德音周愆封斯樹斯納
斯銘石垂千百年永奠玄宅

封承德郎戶部主事樂圃楊公暨配贈安

人韓氏馮氏孫氏合葬墓誌銘

公諱鸞字時禎別號樂圃山東登州府寧海州文登縣人也祖興于永樂二年隸籍彭城衛遂家京師祖能父達母趙氏于弘治庚戌十一月初九日生公惇朴不華天性孝友幼失父每以不逮養爲痛事孀母曲盡色養能得其歡心撫弟鳳爲之授室立業庭內無間言性故侃直好與人之善良者游遇險詖人必規之以正甚爲

嫻黨所憚然至于調急恤困則又必盡力之所能及而後已獨不喜佛老曰善自人所當爲使爲福田脩行利之爾其達觀如此尤善教子長子運使君質敏授以儒業次子有心計則命之服賈故儒以甲第起家階三品而賈以勤勵殖其業鄉人榮之晚年謝人事治圃明農時吟咏以寄思方運使君任戶部主事時以三載績最敕封公承德郎如其子官迨運使君任兩淮公幾耄壽矣形神康泰猶嘗奉養于宦所歸家甫

三月無疾而卒時隆慶丁卯九月初八日也得年七十有八元配韓氏贈安人秉儉與勤克閑婦道生于弘治乙卯九月十三日卒于嘉靖甲午二月十七日得年四十繼馮氏未幾卒繼孫氏有女德撫二子如同出生于弘治辛酉九月二十三日卒于嘉靖辛酉閏五月二十二日得年六十有一公子男二人長君璽登嘉靖癸丑進士任兩淮都轉運使娶徐氏繼方氏王氏韓出次君璧娶李氏繼梁氏孫出孫男五從詩早

卒從書順天府學生娶張氏從履娶陳氏從儉從約俱幼孫女一御露曾孫男一惟屏曾孫女二公既歿運使君擇以是年十月十有三日啟韓安人暨馮氏孫氏窆合葬于城南疙疸莊祖塋之次廼持鳳陽府同知田君汝耕所爲公夫婦狀屬其同年友史維氏銘之銘曰惟躬壽康惟子孫蕃昌作善會祥天道孔章茲惟玄堂既固且臧于斯年未央

奉政大夫陝西臨洮府同知歷山馮公墓

誌銘

歷山馮公者諱舜田字歷夫其先河南龍門鎮人也十世祖諱俊者避宋金之亂始徙蒲其子惠爲金萬戶招討使四傳及公高祖諱祥者以有道稱曾祖盛景泰庚午舉人秀府紀善祖從政成化丙午舉人河南汲縣知縣父紹鳳陽儒學訓導母王氏以弘治甲子十一月三十日生公公生有茂質祖汲縣公愛異之甫弱冠補郡庠弟子員甲午登山西鄉試上第甲辰春授河

南汝陽縣知縣丁外艱服闋改授山東日照縣知縣陞臨洮府同知以卒公才器俊拔侷儻有大志初學舉子業卽能爲驚人語大爲時輩所推長益矻矻不倦耽心藝林期大觀遠覽以自奮其奇故舍毫所至無不綜貫經史兼獵百氏雲蒸霞蔚頃刻萬端雖制科式程遵其趨步而委蛇闔闢以沂洄于規矩之中者汪汪自如也視學使者若西坡劉公中川陳公漫山曹公亟加獎許待以異等一時文譽赫然著聞從學之

士有不遠千里至者公教人雖脫去凡陋不事
雕鏤然亦必隨其才質之宜示以階級觀所謂
白坡私訓者可考也其制政有局幹不耐爲俗
吏態初令汝陽未數月以制歸其民至今思之
比今日照仁其民一如汝陽者日照齊之東偏
海濱廣斥人鮮生業公殫心圖之省刑役薄徵
斂導樹藝立保甲于是流民復業者三千戶荒
田墾者四萬餘頃桴鼓不鳴而四境訥訥然治
矣又建奎山書院于邑之西南擇邑子弟之俊

秀者以歲時居業其中又教民以瓦棺易火葬
俗爲一變焉公守已甚嚴居官凡十五年歷三
任家無羨蓄其任臨洮也主督軍餉于蘭州每
歲出納以億萬計公一以廉正蒞之盡剔納戶
委吏之奸軍國稱便嘗承委覈甘肅儲峙有巨
猾夜以兼金餽之公不受卒論如法諸所閱實
甚衆時謂諸子曰若幸自立吾不能以墨佐若
也其斷獄又以平反爲主多所全活如山東李
仙桂扶風馬大海咸繪像祠之其制行純恪端

雅事親孝待弟友處姍黨睦與朋友篤布衣蔬
食終其身不貳焉丙辰二月十七日以疾卒于
靖虜衛之公署距其生得壽五十有三公凡五
娶初配王氏繼王氏李氏薛氏翟氏子男三人
濂奉祀生員娶張氏繼范氏洛州學生娶楊氏
洮早卒女一人適劉衍枝孫男二嗣科聘王氏
濂出嗣第幼洛出孫女一幼公初配王氏余母
之從姊妹也余幼往來外家每覲公心竊偉之
後余表舅草窻景公謂余曰某與馮公曾同落

秋試馮君喟然曰古人稱不朽者三丈夫當有
取焉顧此區區者足念哉余聞而益偉之今觀
公之自立班班者誠有味乎其言也公所著有
蒲州新志馮氏家乘西行詩草白坡私訓及文
集若干卷藏于家公之季弟澤甫者公教以舉
子業與余同舉于鄉復同舉進士其爲余道公
行甚習今歲戊午子濂輩諏于某月某日將葬
公程胡莊司訓公新瑩兆次子洛爲狀以索銘
于余公余素所畏也按狀又與澤甫之言合余

宜銘公銘曰熙代崇文興庶職引規布矩示標
 式士執尺觚轉沿襲剗奇削異束繩墨吁嗟惟
 公擅孤識商彝周鼎恣遊息吮醲剥華窮探測
 博收廣運賈餘力褒衣緩帶行翕習蛟騫兕吼
 羣形匿從容尺寸靡差忒褰裳往就津涘惑位
 不酬才行道盡豐積寡受後必殖我銘玄堂歲
 千億

封奉政大夫河間府同知湖莊任公墓誌
 銘

公諱景玉字彥輝別號湖莊蒲之信昌里人也
 公叔子子中今為山東布政司叅議信昌在郡
 城東北四十里水土茂美俗安耕織百年二絃
 誦聲公故有識量及叅議君生質甚穎公乃遣
 入郡城從師學里人姍焉公供督益力嘉靖壬
 子叅議君遂以周易領鄉薦山右列郡稱文學
 科第以蒲為首然往往不出郡廛十餘里中諸
 鄉社去城遠者至百餘里士成名者蓋鮮即名
 成宦亦鮮達其裒然紆金紫位方岳則自叅議

君始也故今諸鄉社士游郡庠者彬彬然視曩時不啻三倍咸自公啓之公既歿參議君自上谷奔歸擇于某年某月某日葬公新趙村之東新阡乃匍匐手公狀屬其友人天官氏維誌而銘焉禮也按狀公姓任氏先世臨晉綏化鄉人洪武初高祖直始籍于蒲曾祖恭祖榮父安母某氏公生而慷慨矜氣節乃中懷坦然始終不與物忤嫺黨有訟者質之公一言卽兩釋退無異議其侃正足賴也力勤善治生中歲殖田產

甚夥比參議君貴初敕封公文林郎平谷知縣尋誥封公奉政大夫河間府同知凡再受賜典視其德澹素謙抑不異在寒素時而樂善好客扶貧濟弱唯其力所及則爲之絕不爲蓄貯計云公恬逸自適參議君宰平谷時嘗一至宦邸後參議君位益高且所歷多邊地公優游里居不復肯出素少疾病臨歿猶健步田野間如常時歸呼諸子囑節飲慎交遂端坐瞑目而逝三日色不變見者異之公生成化丁未三月五日

卒隆慶辛未十月廿一日得壽八十有五配趙氏繼配趙氏封孺人加封宜人子男五人勝娶郭氏旺娶薛氏先配趙氏出相娶馮氏彬卽子中娶何氏封宜人官娶寇氏繼配趙宜人出女五人閩宗極張孟暘王棟廉進科李應甲其婿也孫男十五昆娶趙氏勝出舜辰娶賈氏拱辰聘陳氏俱旺出湯辰娶趙氏武辰聘趙氏三僮俱相出翰辰娶展氏慶辰聘馮氏諫辰覲辰仰辰侍辰俱彬出蠻子早殤書僮聘張氏新僮俱

官出孫女三一適王仲金一幼俱相出一適生員李溥彬出曾孫男二曰穩子曰尙表曾孫女三曰麥兒曰果兒曰雪兒銘曰東原鬱鬱仁厚之里淳德是居葆貞胤祉曰貞惟何集善在躬太樸未斲春陽正融曰祉惟何昌在來裔桂籍起家瓜瓞衍世有膺斯域卜兆孔新公神歸焉萬禩永寧

徵仕郎中書舍人止一王公墓誌銘

公諱珂字仲鳴別號止一齋前曾山教諭贈徵

仕郎中書舍人敬齋公之季子也年四十五以嘉靖己丑二月十六日卒于京師歸櫬于蒲葬于花園村祔敬齋公兆次後二十八年爲嘉靖乙卯公配馮孺人卒次年十一月遂合葬焉公余先母王孺人之季父也于余爲外叔祖初公之葬也未有銘至是舅氏以狀徵銘于維維屬在諸孫且稔聞叔祖德美因不敢以不敏辭按狀蒲王氏蓋自榮河遷云王氏在隋唐間於河東最爲著姓榮河其裔也公始祖諱仲文者始

徙蒲生子彥純傳公高祖秉信曾祖景嚴祖榮歷世載德及公父馨遂以儒學起家贈中書舍人敬齋公也母贈孺人張氏有壺德以成化乙巳七月十五日生公公幼寡啼笑慎威儀靜卽沉沉冥坐若有思者比受學日受百千言嚮往甚精悍甫弱冠卽沉酣經籍獵及百家子史之言性至孝愛而謹禮食飲蚤晏出入疾病進退唯諾悉中節文昕夕不能離顏色贈公初任鄧庠繼遷魯山公悉隨焉迨歸補蒲庠弟子員聲

藉日益甚時諫大夫慶陽呂公以言事謫貳蒲
雅敬重公延爲其猶子今京兆公顓子襄陽公
顯友相與淬礪卒皆有聞于時是時贈公亦辭
官里居公雖發憤志學迺心罔不在父母與諸
兄孝養隆至晨昏省覲而後就學其充養益深
專心濂洛日與易通太極圖出入爲伍久之有
所得迺言曰誠吾身也反而歸之吾性也博而
約之吾本然之天衷也窮而至之聲臭泯然吾
元化之混沌也故曰無極而太極也自是而陰

陽而五行吾形色之造端也通貫本末周流造
化誠其萬化祖乎生民初乎吾身吾性之終始
也語意與圖說相表裏徵以子思之論則周原
本造化以通其德公總攬進脩而會諸誠其天
人之辨與嗚呼微矣正德己卯舉于鄉辛巳卒
業成均會毅皇帝厭代今帝踐天子位詔史館
纂修先朝實錄百執事所需厥惟俊茂命大臣
慎選以充公遂首薦薦爲試中書舍人與史事
明年壬午贈公卒公大慟奔歸張孺人亦復薨

病公痛徃愛日孝益嚴癸未孺人卒治喪葬悉
如禮時高陵呂太史判解州呂素講性命因肅
公與語懸然契解終日莫逆焉遂內交丙戌登
進士以前史館勛授中書舍人典誥敕時天子
勵意唐虞日御經筵詎治理輔臣祇惟聖學之
重恪選吉人共事左右公寔與焉贈公及張孺
人之恩命在是時也公居官清慎雖位望華顯
而自奉甚廉雖資譽日隆而約身益卑遇親故
特有禮他如視鄧友之疾而歸其喪解州人王

氏之厄而卻其獻當大臣抱不測之譴而祖其
行諸皆盛德事勤于官守隙卽事于學無晝夜
四方士多從游者又感養不逮親遇歲時生忌
及諸俸入恩資輒設奠慟哭焉嘗欲疏陳得失
以報遭際稿具矣會疾未上而卒公惠和外示
藹藹可親其中毅然不爲非義撼動性澹素樂
成人之善人有藏險習紛斥遠必力步履有矍
寒暑雷風尺寸不忒其儼然矜莊之色雖千萬
人可貌焉事諸兄愛敬以終始與人有恩義賑

困窮不計有無公既歿里人溫清者貧甚售產
 得金持詣公主前拜謝而去曰王公數賜我不
 為券迺其恩何可忘若他負雖日闕我顧吾力
 不支爾其盛德感人類如是也其學洽聞約取
 居敬存誠參伍神明尚友千古至于文辭書法
 亦皆端靖離俗可謂德藝洵美卓爾不羣者矣
 狀云公始卒蓋皆有異徵云初張孺人方身公
 則夢音樂幢蓋導捧一男子至其男子衣冠儒
 也貌瑩瑩如玉有神介之曰都帝詒汝警而語

贈公贈公曰此大吉祥故公之生也贈公異焉
 及公將歿呂京兆公時為比部郎則又夢公擁
 騶從道宣武門而去顧呂曰吾茲有稷山之命
 行蒞之矣嗚呼豈不異哉吾意天生哲人必賦
 以特異之氣則夫作為迢迢固然與尋常不同
 其來去聚散靈變恍惚要有不可測者觀于公
 可見也公恒曰王氏自祖父積德百年天鑒悠
 矣今之盛寔惟申錫其信然與公所著詩文凡
 若干篇併語錄載家乘絳州志刻于絳配馮孺

人內行甚備公禮之如賓別有銘子男二人長
崇雅已酉科山西解元有道而甚文公未究之
緒將益光大未已也娶楊氏仲崇勳居商能家
娶趙氏繼聘傅氏女一人聘崔登雲先卒余先
母王孺人好稱述外家事訓勵諸子嘗曰季父
事父母先意承志惟恐稍傷其心見人有患楚
事若在身者愛諸兄弟之子一如已生蓋古人
也始兄弟以家指滋衆業已析產矣時祖父母
猶俱存季父曰其如甘旨何又有二三兄同遂


復合爨終祖父母之身銘曰巖巖峴巘膏玫是
滋燁燁芝英靈囿粵之有赫降哲世德攸基匯
粹涵貞玄羨未漓弱慧長通有執斯弘蹈蹤經
轍游神藝叢顓斯探驪下彼雕蟲惟業之修惟
德之茂立愛曰親因心則友內外孚仁闡明一
守有行厥藏亦孔之明載驤載躍于邦于京執
緇石渠侍對天章篤慶方流未濬攸止淳曜胤
祥胥維孫子膺膺崇阡氣亦完只有銘在石考
于千祀

封修職郎國子監助教原泉任公暨配孺

人李氏合葬墓誌銘

南康府太守任君汝專將合葬其父母乃手自為狀匍匐而徵銘于余先是太守任國子助教之三年以德誼為六館最上狀吏部在令甲當給勅進階太守上疏以情陳詞甚懇天子感焉乃頒敕移封其父為修職郎國子監助教于時原泉公方祿養京邸鶴髮蒼顏錦衣束帶拜受恩闕下見者豔之而且謂天道有知也公幼益

嘗攻舉子業有成緒矣乃不獲究其志棄而服買士友惜焉比太守君弱冠領鄉薦咸訢訢謂屈伸乘除之應至是而公復身都其榮焉孰謂天難必哉公居鄉稱長者而太守君恂恂謹厚秩方面視其德不異塾庠時余既雅重公父子乃諾太守之請誌其世而銘之按狀公諱光溥字某原泉其別號也先世為臨晉縣令東里人元至正間有敬之者為河東驛丞占籍焉是為蒲之始祖公高祖彥中曾祖宣祖恩父敏鄉賓



母楊氏公生而秀慧有立志幼治周易日夜孜孜用心甚苦以家累不獲卒業然志在是也故雖挾貲遠游所至必以篇簡自隨遇先賢嘉言善行則手錄之久久成帙題之曰日用錄蓋若昔人自警編意其爲人謙抑謹畏表裏若一居家孝友尤嚴事鬼神享祀誠敬太守自知學讀書公教之悉有條貫誨督嚴密故成名甚早比太守服有官守自國學陞揚州府同知歷今職公悉隨之諄諄以謹操持重民命爲訓故太守

所至以清慎見稱夫有所受之也配孺人李氏者處士迪女溫厚而慈具有婦德以孝奉其翁姑以順睦其妯娌以勤儉相其夫以嚴正訓其子女足與公稱儷美云公生弘治辛酉正月十一日卒隆慶壬申八月五日享年七十有二孺人生弘治戊午三月十三日卒嘉靖乙卯十二月十三日享年五十有八子男一人賢卽太守娶孫氏繼吳氏女四人長適隴州知州楊良材次適沈應泰次適山東道御史楊相皆孺人出

其季字薛茂仁公繼配張氏出也孫男二長康
 聘李鴻紳女次慶聘舉人楊德燿女孫女一字
 太學生馮福慶銘曰有其匪之濬靡不通有其
 積之享靡不豐惟公夫婦居德攸同敷膏韜曜
 不顯于躬施及嗣人榮祿具膺物情允穆神理
 可徵有崇者阡雙壁是封萬年孔固銘在玄宮

文林郎陝西鞏昌府禮縣知縣雲岩張公

墓誌銘

禮縣令雲岩張公既卒之明年其子進士雲翹

將以某月日葬公某地乃介余同年友河南按
 察司僉事登山劉公狀公世行走使京邸以徵
 銘于余余自為諸生與公交迄今三紀矣公器
 度凝遠豪邁自負睥睨流輩中謂功名可立致
 其一時同學士亦多讓之迺竟不偶有司歛是
 聲實施于哲嗣將不謂天道哉公之自禮歸也
 余方山居公過蒲訪余廬城中而去比余聞而
 追公不及也余時欲東遊傅岩陟吳山禮泰伯
 祠宇遵鳴條陌而北尋巫咸氏故居擬拉公偕

往焉俄被徵命赴都不及行已乃聞公訃生死
交情不及一訣別心盡然念之故于進士君之
情不辭按狀公諱良貴字幼脩雲岩其別號也
張氏世爲安邑著族公曾祖榮受易文清薛先
生之門祖琢父訥封奉直大夫母白氏封宜人
以兄南京戶部員外郎條岩公良知貴受賜典
也公少穎敏攻苦問學志趣甚銳每督學使者
及諸監司校藝輒置之高等凡八試于鄉不第
貢入太學人咸以科第遺才惜之辛未春授陝

西禮縣令地僻而壻百務悉懈弛乃極力興舉
之比暮年邑事駸駸改觀豪黠靡敢撓法民訟
用簡癸酉公有疾致政歸其秋雲翺舉于鄉明
年登進士授山東掖縣尹人咸謂公未竟之施
于是乎在未幾公竟以前疾而卒萬曆甲戌十
二月二日也距其生正德丙子三月十二日得
壽五十有九公素以名節自勵于人無詭隨于
物不輕取與其事親孝執喪以哀毀稱處兄弟
友愛篤至直而不激矜而不爭迹其終始可列

于君子之林也已公配馬氏有闡德生子男一
進士雲翹娶賀氏繼李氏孫男二家蔭家禎孫
女三俱幼銘曰安邑族望于今惟張迨公昆弟
丕闡其光伯氏莪莪天達高驥曰叔曰季接武
簪裳公奮其間競爽珪璋匯浸含芳再世而昌
方興未央鬱鬱玄堂哲人永藏有銘不忘

封奉議大夫水亭王公墓誌銘

王氏爲世著姓凡海內郡國無論遠邇靡不有
系派焉然惟居太原者爲族望漢晉而下聞人

偉士燁然稱史籍者亦惟太原視諸郡國最蕃
蓋于今爲烈云歲己酉余應秋賦太原獲與今
行省右丞王明輔氏同舉于鄉于時明輔未弱
冠聲稱藉甚聞之太原人咸謂其大人水亭公
善訓使然比明輔叅知陝藩公年七袞矣余以
文爲公壽後三年公歿明輔乃馳使燕京齎前
守臨洮東岩唐君頤所爲公狀屬余誌而銘之
按狀公諱尚智字哲夫先世交城人也其徙居
陽曲寔自六世祖大用始曾祖延祖琚父鼎母

梁氏公幼負奇氣嘗學舉業一試補諸生不遂
卽毅然棄去入貲爲按察司承差嘉靖戊戌謁
選授順天府義豐驛丞地衝而近都久爲猾窟
公至則悉以法網紀之猾大懟遂構公大察已
又構公東廠皆見格猾乃解去肅皇帝南狩巡
撫張公檄公同永平薛推官除館舍司供頓薛
不勝懼竄避民舍中公獨力應之迄駕旋事稱
辦張公下檄獎之有曰才堪重委志不同人蓋
奇之也時有胡總督者方貴幸諸求附麗者唯

恐不得胡簡公自隨公詭以它故辭去俄而胡
敗東人莫不賢智公壬寅陞真定府豐盈倉大
使甲辰秩滿改直隸北峽關巡檢公局幹甚優
歷任皆末秩所至不勞而理居多暇則闢塾延
師汲汲以課子爲事明輔質賦警穎且南北師
友多雋才故其學夙成戊申試補郡弟子員高
等公聞之卽投綬歸己酉明輔舉于鄉庚戌登
進士颺歷南北裒然爲當代名卿今太原人言
善教子者必曰王公云公襟度夷暢與物無忤

當其意氣投洽雖少賤卽成斷金好義樂施不問貲產太原嘗大侵人多轉死公出粟賑之且瘞旅櫬之無歸者虜屢闖太原巡撫萬公下檄所司修會城樓櫓時公帑鮮羨蓄公首入五十金佐官費太原人遂競出所有萬公義之工竣聞于朝詔有司以羊酒勞公表其宅舍太原守臣慕公義延賓鄉飲士論宜之公性喜賓客座上常滿不卽携壺榼過諸丈人故交遊遍閭閻歲時佳勝必宴遊諸別墅中覽秀濯清自謂不

減南中焉公生弘治戊午十一月十九日卒隆慶庚午六月一日得壽七十有三明輔同知大名府時奏績最誥封公奉議大夫公初配郝氏贈宜人繼米氏封宜人子男二人道行四川布政使卽明輔娶楊氏封宜人米宜人出道明太學生娶陳氏繼馬氏側室汪出女一適生員張紹祖側室蔡出孫男一育才府學生曾孫男一女一俱幼葬域爲城東新都村之原葬期爲卒之年十二月九日銘曰惟汾匯精汪汪其度播

潤伊邇含滋則富蓄極而通浩派東注宏施具
 達穰祉斯聚里閤歸仁林園寄趣黃髮徜徉素
 心靡慕哲範既往徽風可溯玄堂有銘萬年孔
 固

宗室奉國將軍月泉墓誌銘

奉國將軍月泉者名聰澱高皇帝五世孫也高
 祖為代簡王曾祖為襄垣恭簡王祖為鎮國將
 軍精一齋父為輔國將軍靜軒國典凡宗室子
 既生該王府具奏天子命宗人府製名編之玉

牒所以明系惇親禮至隆也宗室崇重賜名自
 恭簡始封於蒲世以行行在髫年即復各有別
 號踵習既久視別號若名焉語其名雖叔伯昆
 季弗相諳也故將軍稱月泉云靜軒凡五子將
 軍居其季其四兄曰清泉曰雙泉曰寒泉曰石
 泉各讀書善詩好從縉紳大夫游人稱四泉焉
 將軍篤信好禮有諸兄風靜軒既歿將軍時尚
 稚母荆夫人在堂左右服訓甚適其心朝夕承
 養不違其色荆夫人憐其孝謹嘗稱曰此兒後

必昌家于時宗室祿入豐衍諸王孫競爲多忤以聲色服馬自娛將軍獨退然若素士綜紀內外不妄用一錢及見老弱疲癯與有婚喪者賑賙援濟唯其力不恤也邇時縣官不足諸宗室祿益殺匱者不能供俯仰而將軍獨沛然有贏餘人謂荆夫人於是知子矣將軍雖制用甚廉而臨財能讓諸稱貸人有不能償者輒棄其券初析產有祖業蓮塘一區當以半付將軍推以予兄嘗卜塋域以價估付田主迺其人內損銖

兩以賺其衆衆弗忍遂大闕將軍聞召語之曰金緣吾謬少耳毋庸爭也因訊給其數當是時徵將軍田人幾有死者蒲人大義之待族黨有施惠馭僮僕以恩居暇常延文雅客彈碁清飲浩談疊疊終歲晏如也配王氏湖廣荊州府經歷惺庵公之女誥封淑人繼傳氏亦先將軍卒俱有內則子三人伯俊宋配丁氏仲俊樵嗣寒泉後配王氏季俊榮俱封鎮國中尉女一人封雲莊鄉君歸李邦彥封承務郎將軍生弘治乙

仙苑集卷之二十一
三百廿三
丑七月二日卒嘉靖乙卯十二月十三日得壽
五十有一卒之明年中尉兄弟將于十二月二
十一日葬將軍王莊新阡持將軍猶子秋溪俊
櫛所爲狀請銘于余余爲童子習句讀時與中
尉兄弟同師在諸童中最契且日往來道將軍
之門其習聞將軍之休舊矣凡狀所云云實然
是宜銘銘曰居貴思謙履盈不渝芟夷外孽受
此中腴猗維人今與古爲徒

封朝列大夫松軒南公暨配肥城郡君合

葬墓誌銘

友人南君士薰將合葬其父母于條山原之新
阡迺介其姊文鳳陽府通判陳君爲狀以請銘
于余南君父曰朝列大夫松軒公母曰肥城郡
君松軒公先郡君十有四年而歿郡君懼坤變
迄今亦且七閏士薰朝夕皇皇深惟吉地之卜
歷久而始克合葬焉蓋其慎也余自志學獲與
士薰游出入同館舍士薰韻度典秀操履甚清
約不類國戚家子見者咸謂本于其父母內訓

則然公與郡君德美余故稔聞之凡陳君所述
悉不誣乃次第其語爲誌而系之以銘誌曰南
氏其先爲平陽之臨汾人公曾祖諱茂當國初
時選戍于蒲遂爲蒲人祖晟父忠母某氏公諱
九貢字賦之幼凝重不輒與羣兒嬉戲比長選
尚郡君誥封朝列大夫是時國戚方貴重公益
持之以謙恂恂謹飭游情詩書間絕無態色驕
氣事母夫人以孝聞好義樂施不貴苟得常宵
行于道得遺金坐以待其主旦至歸焉蒲人甚

多之好登眺山水時形諸繪事率穠至有精采
蓋其趣寄夷曠若此至于治家教子其勤儉嚴
慈悉有尺寸云郡君鎮國將軍成鋌仲女襄垣
王之孫女高皇帝五世孫也母羅氏其生也寔
感異夢莊肅柔順鎮國鍾愛之及笄誥封肥城
郡君歸于南恪執婦禮不以貴驕其夫家事姑
誠孝備至食飲必親治乃進至于女紅紉組亦
皆精絕處嫺黨和御臧獲恩凡女德咸備當郡
君初歸時南氏故饒宗人祿給又豐且時郡君

性喜施遇歲稔炊食以餉饑者多所全濟及大
夫歿諸子幼遭家中窶郡君備歷艱楚無不豫
色卒教訓子有成業可謂賢矣公生弘治甲寅
十一月十七日卒嘉靖壬寅十一月二十五日
得年四十有九郡君生弘治甲子三月二十一
日卒嘉靖乙卯十二月十三日得年五十有二
子男四人風卽士薰今更名金州學生娶王氏
次某娶某氏次某某女六人長適鳳陽府通判
陳永直次適國子監博士孟汝蒞三適宋彥隆

四適州學生苟策五適總旗蘇濟六殤孫男一
有慶習舉子業孫女一適李統俱金出銘曰惟
德之恒惟義之貞豐否攸寧交愛相成粵惟哲
人之行惠終令名膺彼條原有鬱佳城雙壁完
歸永保爾後生

泰州同知愛山賈君暨配郭氏白氏合葬

墓誌銘

君諱鶴齡字仁夫別號愛山世爲河東臨晉縣
人高祖珍曾祖茂祖表由邑庠貢入太學仕爲

宿州判官父蘭號疑南多積而能散閭黨歸其德母王氏君之將誕也母夢白鶴自空而下故命之曰鶴以志異也幼穎慧成童知學卽晝夜自淬勵不倦補邑庠弟子員志趣甚遠會疑南公以家政之夥不禁勞瘁以君雅有心計命之綜理因人貲爲國子生君理家務十餘年貲產滋殖好義樂施爲能恢廓疑南公之業而衍其仁澤其待族黨尤睦有田爲之耕無田授之貲幼而敏者教之塾人尤以是多之天性孝友嘗

曰吾不能竭力供子職資父母之養以養父母敢不敬乎迺于温清定省之節懇懇致詳焉母有羸疾君百方延療遇晉陽蕭醫士者藥有驗遂葺屋居之給田養之蕭因終身依君不去友愛二弟爲之延師取友訓迪甚力故昆季咸有聲邑中君筮仕爲鴻臚寺序班能于職陞本寺主簿遇穆廟覃登極恩贈其親如巳官奏績得上考陞深州判官深地下故多水患監司廉君才令專理之君以舊堤卑薄不能任衝激乃增

築重堤以捍之疏支河以派分其勢水患頓息
陞泰州同知甫一載卒于官君有幹局兩任劇
州皆以清勤見稱其爲人豁達樂易與人交出
肺肝相示無纖介隱歿之日邑人聞者多歎息
泣下無論識不識也性敏多通凡釋道醫卜諸
書類涉獵之獨于地理家最精君生正德庚辰
正月十四日卒隆慶壬申七月念三日得壽五
十有三配郭氏前濟源尹士奇女生正德戊寅
四月一日卒嘉靖丙申三月十六日得年一十

有九繼配白氏有婦德鄉耆景春女生正德己
卯三月六日卒嘉靖丁巳十二月十七日得年
三十有九子男二人瑚邑庠生先卒娶謝氏太
學生誥女璉邑庠生娶楊氏慶陽府通判時芳
女孫男二勳瑚出煦璉出孫女三一字楊某二
幼俱璉出璉將以萬曆癸酉葬君和村新塋遷
郭氏白氏二柩合祔焉乃介姻友張君治化以
狀蘄余銘銘曰二疑之原泉甘土腴君代是居
醇德靡渝世澤弘敷穆穆里閭仕匪祿之狗榮

是簪裾蘭茁盈區惟慶之餘玄堂考德貞石不誣

山東齊河縣主簿忠齋劉公墓誌銘

忠齋劉公簿齊河兢兢守官憲以吏幹爲監司所才檄視太和稅入倍贏檄督德州餉課辦稱最于是漕司空檄公西取諸閘版具次衛源以疾卒惟時伯子從仁方應恩貢入太學以文行稱于六館余延之家塾教諸子聞公訃從仁卽毀踊西奔乃懇懇以公之誌銘見屬旣抵解治

葬有日以狀來申前請余獲交于公二紀餘矣公故丈人行乃情蘊樂易一見使人可親頃公謁選見我燕京寓舍其容色風度宛與二紀前時不殊私念公且遐壽不意遽至此也乃愴焉誌而銘之以貽伯子按狀公諱登庸字士揚忠齋其別號云世爲解之字民坊人曾祖某祖水龍父節王府典膳母袁氏公兄弟凡四人公其仲也公幼聰慧業儒治書經補州學弟子員涇野呂先生謫倅解梁立書院簡解士之儁者與

之講析經傳公與焉久之援例入國學天性孝友事父母養致敬喪致哀爲宗族鄉黨所稱兄弟怡怡終始無間伯兄官鄆杜罹危疾公携醫星夜往視御以歸里人義之他如伯父某無嗣則養伯母如其母燠哺從兄之貧者沒爲收葬之聯綴遠族歲時合祝而通其慶弔皆孝友所推也氣度寬裕不與物較尺寸而獨慎于取友不妄交居常訓子姪曰吾世以耕讀爲業若輩須努力爲好人毋爲族里所訾常以邵堯夫孝

弟吟及普明兄弟同居併婁師德丙吉諸厚德事大書于壁使朝夕省觀有所感興中歲頗以塲圃自適時疏殖花以彈琴讀書其中暇則治諸方藥用濟貧病之不能自資者其致足稱也公生于正德丁卯二月二十七日卒于隆慶庚午四月二十二日得年六十有四配呂氏繼暢氏子男四人伯從仁恩貢生娶李氏呂出仲體仁州庠生娶史氏叔行仁娶王氏季得仁女一人字照磨閻應時子塤俱暢出孫男四某某從

仁出某某體仁出孫女一適庠生孫緒銘曰於
 惟公晬厥容入孝友出信恭政小試道有終嗣
 振振餘慶鍾條之麓氣鬱葱安且吉啓玄宮萬
 斯年永無窮

山西潞安府儒學教授前山東沂水縣知
 縣鳳岡孫公墓誌銘

鳳岡孫公既葬之明年其季子太原府推官化
 龍以狀來徵余為誌銘將以追而納諸羨道化
 龍余前丁卯典試順天時所舉士也既敏而雅

余一見異之詢知為儒家子將謂訓習則然茲
 覽狀述則又知世澤淳蘊久矣宜其達也按狀
 公諱光祖字紹先別號鳳岡世為真定之獲鹿
 人曾祖茂山東卽墨縣主簿祖璨浙江紹興府
 照磨父謙晉府典膳母蕭氏公生而穎敏弱冠
 補邑庠弟子員篤志力學終始不懈遂以文學
 著聲庠序中方少司馬永康王公以兵憲駐鹿
 邑時妙簡俊異朝夕與談經史公與焉然困于
 數奇累舉竟不第嘉靖庚戌貢入太學甲子選

授山東沂水知縣沂土瘠賦重民多亡入它邑公設法招徠之歲中復業者相繼均徭役慎刑罰民甚宜之然性故勁直自遂不能作世俗俯仰態邑利弊當興除者輒毅然任之其諸監司隸人以事至邑者又數以法繩其肆由是監司滋不悅明年遂罷邑事又明年改山西潞安府學教授持身立教諸生復甚宜焉居二載告歸放情山水以琴書自娛絕不爲子孫產業計隆慶己巳七月十六日以疾卒距其生弘治乙丑

三月十三日得年六十五歲配趙氏生子男四應龍乙卯武舉娶姜氏從龍武生娶高氏攀龍庠生娶高氏其季則化龍也登戊辰進士授山西太原府推官娶崔氏女二長適庠生周九思次適知印王無私孫男七修業娶姜氏續業娶胡氏衍業娶杜氏廣業新業振業俱幼一在襁褓孫女十一長適高嘉瑞次適胡蛟次適傅訓餘未字公平生方介不苟合與人無城府不爲飾言性不宿怨邑人聶姓者嘗與公有卻會以

修齋室集 卷之二十一 三十一
誣繫獄公爲白其寃其教子嚴而有法故諸子皆克肖公旣歿應龍等以其年十一月十五日葬公邑西北奇山之陽祖塋銘曰曷績厥學迺究未洪亦裕厥修迺享未豐譬彼澄淵匯極則通餘慶載鍾博碩顯融萬年考德銘在玄宮

永壽縣教諭西郭崔公墓誌銘

西郭崔公者諱朝佐字某其先屯留之崔明岡里人也六世祖諱彥美者當國朝洪武初爲潞郡掾因占潞籍迄今子孫家焉彥美生仕岩公

高祖也曾祖曰景春祖曰鎮父曰友能以耆壽得官配韓氏繼配路氏公路出也幼警異伉伉自負不與群兒類家故力田公則以明經自奮弱冠爲郡諸生專精易學旁貫諸子史切劘師友日孳孳無替夕是用沉涵浩博邃有所詣一時學者爭師事之焉嘉靖丁酉有司上歲計貢入禮部戊戌春遂謁選授山東陵縣訓導以母老爲祿仕也而路孺人憚道里雅不欲行公乃單車之任留妻子侍養于家時寄俸給供菽水

每歲時佳勝寮友讌集輒憶母而泣陵尹沈君以終身慕稱之庚子丁路孺人憂哀毀有加而葬祭以禮既襄事迺率鄉人修藍田呂氏鄉約崇儉禁靡恤窮濟匱于是習俗一變環所居雍容如也服闋補直隸慶雲縣訓導丁未陞陝西永壽縣教諭公凡教三邑所至必陳條式明嚮導崇獎德行嚴督課業以成就人才爲已任每謂士須自重庶他日可以有爲故常以節義爲訓首約士不干有司諸被其教者咸有所興焉

在永壽凡幾年會仲子宗舜殤歿慨然請老而歸視學使者嘉其節固留不可因移檄原籍旌之公幼志于學長益肆力不懈砥躬礪行靡有愆言勤儉仁嫻始終一節其可謂惇篤尚行之君子矣深造大積不旣厥用而流慶衍訓遺于後人迺伯子宗堯癸丑登進士第人咸謂爲公未究之澤云公生于成化丙午七月廿七日卒于嘉靖辛酉四月初九日得壽七十有五初配王氏事姑以孝聞婉嫕惠和婦道母儀兩適其

可生于成化某年某月某日卒于嘉靖丙戌某
月某日得年若干繼原氏子男三人長宗堯任
潼川州知州先公十二日卒于官娶張氏繼李
氏韓氏次宗孔郡庠生娶李氏女三人長適庠
生張某次適原堂次適某孫男二人紹勳繩勳
孫女二人皆宗堯出公卒之歲宗孔卜以九月
九日葬公村西祖塋之次介公弟大名府貳守
大德狀公行屬銘于維貳守故受業先生之門
及公伯子潼川君與維皆癸丑同榜士也潼川

君既登第以直道忤北軍貴人坎壈而歿蓋得
于公節義之教者故維將銘公念潼川君而惻
然也銘曰引繩蹈軌瞻容印止孰民之不化而
正斯士熙熙春陽幽蘭布芳奚遠之不懷而仁
斯鄉鳳戢修羽靡宣厥美翩翩章華振于孫子
不顯其光載篤其慶叶萬年考德銘在玄堂

條麓堂集卷之二十七

蒲阪鳳磐張四維著
代郡後學施重光校

誌三

湛泉王公墓誌銘

代作

嘉靖甲子十一月壬戌吾友前吏部文選司郎
中鄉寧王公卒于家距其生正德戊辰七月辛
丑得年才五十七爾初公爲文選郎也善善惡
惡上恬絀倖務存國家憲章以直行已志嘗撮

銓部之務其要且重者條上四事將舉數十年沿習訛陋芟刈掃除之意至銳也會權貴人有以私干者公上疏頌言其事幾陷于危法賴天子聖明得解職去公既去權貴人勢益張銓曹滋不得盡行其職者且二十年迺已故海內士無不喁喁思念公者而公今乃不起耶悲哉余與公游最久相知爲深公志趣高邁耿介自信當其心之所是毅然必遂不可怵以利害苟義有弗安卽若攢芒在身湏臾弗寧處也襟期有

所契會卽其人在千里必通好焉使所遇非其所與雖經日侍側言色終亦不在其人以是獲時之令名然亦以此不達于世其大致然也公諱與齡字受甫別號湛泉世山西鄉寧人曾祖睿祖文封彰德府通判父爵薊州知州以公貴封吏部稽勲司員外郎母李氏封宜人公幼嘗受學少宗伯後渠崔先生之門嘉靖戊子舉于鄉己丑與兄培齡同登進士授蘇州府推官平反有聲陞戶部湖廣可主事調吏部驗封歷稽

勲員外郎告歸侍遂丁父憂起復補勲員外郎會崔先生卒乃上疏送母旋治先生喪事還朝晉文選郎中無何歸時嘉靖癸卯秋也方公之歸海內士無問識不識率望旦夕起公而所忤權貴人當柄久竟不果起公居鄉深自韜匿足迹絕不及公府闢軒儲書藝圃時蔬浩然若未嘗櫻世慮者事母宜人備極色養篤厚天倫拯卹困乏家庭宗族鄉黨之間訢訢如也臨汾西磐張公每以公之忠清諒直勉鄉之髦士三

原谿田馬公爲平陽四賢吟列公于恭介陶公忠定韓公及西磐公之間其爲前輩所推許如此公配高氏封宜人子男二人整邑學生敕早卒孫女二人公旣歿整以公遺命走使持公門人西安府同知李愚所爲狀求余銘余故深知公者不虞公之遽至此也乃哭諸寢門之外而銘之銘曰直道在心矢忠徇國蟬蛻囂埃介然不惑雖身之抑而志可則彼汾一曲清流湜湜靜言觀魚不用九罟祥麟所遊山澤生色君子

攸止習俗承德徽儀云亡清風不熄我銘在斯
過者其式

代府典膳守菴張公暨配孺人曲氏合葬

墓誌銘

守菴張公者諱轍字宗道有道人始余從遊
臨川皆所陳先生之門居業河東書院獲識公
之元子子翔納交焉因得拜公于堂余初見子
翔矩步規言矯矯然若雲鶴之處羣也迺其氣
夷然無矜飾異之已而覲公方毅閎深淵淵莫

測其際類傳記所稱隱君子者益以知子翔之
篤行有自也比往來公家益熟習見公之行事
而聆其論議公執義甚堅遵所知以爲行與人
無僞言其教子甚嚴當余識公時子翔蓋已三
十餘偉自表立卓然有聲山右矣而公訓之義
方如嚴師之臨嬰孺其威儀出入未嘗不肅也
隨事規誨未嘗不切也雖余見公公未嘗不降
顏溫接然每及公門心凜然如近師保焉其方
毅可憚也後余與子翔先後領鄉薦不及拜公

者且十年今歲戊午公以疾卒于正寢卒之越
月子翔衰經走百里手公及公配孺人曲氏之
行實慟哭而徵銘于余夫公之有道宜銘余爲
通家子知公悉余宜銘公因不敢辭銘併誌其
世按張氏先居猗氏國初時公五世祖從者始
徙安邑之聖惠鎮卽今運城是爲始祖從生公
高祖斌當文皇北狩時代兄戊濱百死而歸運
人至今稱焉曾祖祐封監察御史加贈通議大
夫太常寺卿祖珣父華母王氏張氏世有隱德

陰施至公益篤公性純孝器宇凝重幼以庭訓
事儒業有成績矣父亡遂奪志事母及繼祖母
王氏視食朝夕寒暑必謹叔父諱獲者業儒公
以父禮事之獲貢入京道良鄉而卒公奔赴負
其櫬以歸歸而恤其孤寡叔母石氏無養則以
已田資之其女四人則爲備禮歸之比石氏卒
則又悉以奩篋散其女而獨治其喪葬之祔之
可謂篤厚于人倫者也性好讀書每涉閱典籍
必欲終卷故多見聞古今事物尤邃於奇門遁

書嘗曰是書有資于日用甚切不可以術廢也
工書法論字體點畫輕重之義曲中肯綮嘗有
術曰吾孤不能拓先產然守業未敢墜吾無卓
行然守身無大過吾無勢分加人然守法人亦
無侮予者唯教子頗有成吾平生所自守者唯
此耳因號其庵曰守庵其自信之篤如此曲孺
人太學生閻之女鎮江府同知嚙之孫慶府長
史新之曾孫也曲爲河東著姓孺人母張氏者
都御史張公岫之女也閻範甚修教子女有法

孺人幼聰慧閑于母教有淑靜之德女紅中饋
精絕冠一時年十六歸于公相敬禮如賓奉姑
及繼祖姑孝謹無怠公寡兄弟獨一妹公母王
孺人鍾愛之孺人承姑意奉之惟謹凡置簪珥
衣服必畢陳姑所俟小姑取然後收其餘于是
大得王孺人之歡心後王孺人老而患癱不能
步履孺人依侍不離頃刻疾痛痒痾先意承志
鄉黨稱孝焉公生于成化乙巳五月十七日卒
于嘉靖戊午閏七月二十三日得壽七十有三

初援例爲代府典膳以母老不就役終養于家
孺人生于弘治庚午十月十四日卒于嘉靖戊
戌二月二十八日得壽五十子男二人長集壬
子科舉人娶某氏繼石氏余友子翔也次棊安
邑縣學生娶劉氏孫女一瑩姐子翔出字常氏
葬地在城西姚暹渠北岸敕建祖塋之次葬期
爲今歲戊午十一月十一日銘曰張氏之昌寔
始太常惟公似之惟德之行展矣淑人葆和靈
族天作之合允也雙玉承烈爾前行休爾後碩

人振穎國華攸茂支龍之原承帝之兆水浴瑤
華山翔朱鳥青烏告祥日月叶吉于萬斯年永
安玄室

儒官王公世周暨配孺人張氏合葬墓誌

銘

儒官王公世周張孺人者余之妻祖父母也公
諱冕有道而早卒遺孤二人其伯余之妻父也
初公歿二子藐焉始齠公旣鮮兄弟且家無應
門之僕而公之母姬孺人在堂張孺人奉姑撫

孤誓志不二時有匪人覲其弱者曰吾令若貨而產吾且貨若輾轢百端孺人卒不爲動命伯子服賈曰孤而無助將門戶是賴授仲子以儒業曰良人有志而未成其負荷在是也比長俱爲授室後伯子克拓前產而仲子以明經爲諸生卒立厥家云余妻幼失母孺人憐而鞠之恩愛懇至迨將笄爲之筮婿諷之仲子而以歸余余因得諗孺人之淑懿孺人天性慈孝而中有矩矱隱然丈夫之度理事有執當其意慮既定

雖衆議叢沓畧不搖惑故克有成績其治家精敏庭宇楚楚閭內無譁而凡祭祀賓客必極豐腆其自奉又以儉素蓋班班可稱也嘉靖乙卯蒲地大震孺人及仲子俱遇變卒貞行未旌嗣孫未立砥礪終身旋罹異數嗚呼其可痛也夫先是公歿葬程胡原祖塋今歲戊午妻父營新域祖塋之北擇三月二十四日遷公柩及孺人合窆焉余遂爲志其世而係之以銘其世曰王氏自宋元爲河中人諱思明者國初占籍蒲大

通廂公曾祖仲爵祖琰福建興化府經歷父縉
 有耆德為鄉飲賓母姬氏孺人父越母王氏公
 生于成化戊申七月三十日卯時卒于正德丙
 子四月二十二日戌時得年二十有九初為學
 生後授儒官孺人生于弘治己酉八月十七日
 子時卒嘉靖乙卯十二月十三日子時得壽六
 十有七子男二人恩娶馮氏繼崔氏楊氏楊氏
 張氏志州學生娶張氏繼趙氏孫女二人長即
 余妻共幼者方二歲蓋公歿三十餘年而余始

為公之孫婿又十年而孺人歿故余之述孺人
 也獨詳其銘曰夫義而方婦順而莊儀休昔哲
 也春華未榮秋飈驟驚中道而烈也矢志從一
 陳情皎日栢舟競烈也有姑而老有子而抱形
 影維子也姑羞且康子壯既昌九京是悅也玄
 首載縞百年永保與子同穴也有膺北原負艮
 抱坤生氣之結也雙瓊永安百福是荷來祉斯
 擷也我銘貞石納之幽宅萬載以為揭也

儒官東泉王公暨配孺人馮氏崔氏楊氏

楊氏合葬墓誌銘

公諱恩字希榮別號東泉世為蒲之大通廂人
高祖仲爵曾祖琰福建興化府經歷祖縉鄉賓
父冕儒官母張氏公生正德己巳十二月二十
一日卒嘉靖己未十二月四日得年五十有一
馮孺人者公元配也父滄母張氏生正德癸酉
三月十五日卒嘉靖癸巳二月十四日得年二
十有一公幼失怙拮据立門戶遊貨南北足跡
半天下初歲業嘗中耗厲志經營用能復殖其

產尤慎于出納終其身未嘗有錙銖濫費蓋天
性然也事母至孝與人有情愛故聞公歿嫻識
間黨無不嗟悼焉公初配馮孺人淑慎莊肅是
生一女適左春坊諭德張四維封宜人繼凡一
娶于崔再娶于楊間有所出皆不育又皆先公
歿最後娶張氏當公歿時有一子一女未幾亦
皆夭張孺人年甚少泣涕守柩門扃甚肅蒲人
咸高其義而悲之今歲隆慶戊辰公歿且十載
矣婿張四維始獲請告歸為公治殯事十于十

二月乙酉葬公于我眉原程胡莊祖塋啓馮孺人及崔氏二楊氏之窀而遷祔焉初公之葬其父母及其弟東溪君也則卜兆祖塋北立新城至是仍遷之祖塋併公壙悉甃之王氏故河中茂族塋建自勝國時塚纍纍甚衆乃今子姓彫斲羣從中遂無可立後者蒸嘗之托俟異日擇能任者議之公初撫一子曰成今與張孺人相依爲命者也銘曰惟王族殷以蕃百斯年河之間丁中否支用單嗟惟公德則豐配惟淑夙愍

凶後宜昌邁斯窮相北原膺厥土次昆季從宗祖固斯藏永終古公有女女有孫考于世澤則存徵玄石婚之文

毅齋沈公暨配孺人張氏合葬墓誌銘

毅齋公者姓沈氏名廷珍字邦良余祖姑丈也初葬蒲姚溫村祖塋嘉靖辛卯遷蒲程胡莊新阡少叅方山劉公爲之銘誌迄乙卯余祖姑卒將合祔焉值地變不果越二歲戊午余舅憲副鑑川王公同余父相表伯江諏地祖塋之西條

山之麓涓期閏七月二十一日奉公夫婦合葬
焉公歿至是幾五十年凡三葬而始克定兆堂
孫舉人應坤狀其世行屬內孫張四維撰銘于
墓按沈氏其先河中永樂鎮人也勝國時諱孝
先者仕爲參軍提領避亂猗氏明興子恭道遂
占籍焉恭道子政仍還蒲迄今沈氏爲兩地著
姓云公曾祖浩祖鑑俱隱德父明字彥章補猗
氏弟子負受學文清薛先生之門造詣甚正配
王氏于成化戊子六月二十七日生公公幼有

至性四歲失怙事母以篤孝稱事諸兄克恭弟
道伯兄元祥學有聲悉心供事冀成父志元祥
中道殞公痛甚撫其遺孤不啻所生與人交誠
篤不激詭人無不愛且敬者幼知學進取甚銳
後以家務服賈所欲不存也故南帆揚越西歷
關隴乘時廢居用能拓產殖家而所至必携小
學通鑑時誦習之遇事輒有援證工楷書喜爲
近體詩盈于囊篋其嗜好然也歲癸酉九月二
十七日卒于廣陵距其生得年四十有六配張

氏余祖姑也初余曾祖孟儒府君有二女一男
 男即余祖守正公及季祖姑歸薛氏者俱早亡
 余皆不及見而獨獲見祖姑祖姑溫淑貞朴得
 于天性而余曾祖母雷孺人孀居治家教子女
 甚嚴故祖姑之婦道母儀綽有矩矱孝姑和妯
 娒育臧獲上下愛戴焉孀居四十餘年躬服儉
 素謝絕鉛華紉澣茹糗綜理詳密用能不廢毅
 齋公之家而成立其孤晚歲耳目聰明神志清
 爽七十餘猶手自纂繡以教諸孫女紅余幼往

來祖姑家未嘗見其疾言慍色可謂貞靜以全
 天倪者已祖姑生成化丙申三月初一日卒嘉
 靖乙卯十月三十日得壽八十子男二人長江
 娶王氏封刑部主事素庵公之女余母之伯姊
 也次泗早卒冥婚劉氏贈兵部主事虛齋公之
 女女二人長適吳穉次適郭弘毅孫女一人適
 太學生張志道外孫男二人吳周郭積曾外孫
 男二人張嘉蘊嘉猷子姓僉僉然盛矣而嗣孫
 未立吁可傷也銘曰儒行商名湖海之英式訓

修齋堂集 卷之三十六
十三
宜家彤管之華伉茲雙秀宜爾蕃茂豈豐于躬
而齋于後條山之陟負丁抱癸衍慶鍾祥自今
伊始

儒官晉峯張公墓誌銘

公諱治化字子升別號晉峯姓張氏先世自唐
宋時居州東三十里條山下李店莊以榨油世
其業勝國時諱仕廉者徙居州古城大通廟國
初遂占籍焉迄今二百餘年子孫族居其所不
易故州人稱故家者必曰油張氏云公高祖瓌

曾祖紳祖懷父邦畿母趙氏以正德甲戌正月
二十一日生公幼負奇氣弱冠游羣庠習舉子
業喜爲不經人道語諸當道有識奇者間能稱
之然用是亦不能合有司幅度竟不偶再世業
儒生計甚薄而公事親最孝至貨常產供甘旨
以承晨夕歡雖終歲屢空意晏如也性方正有
威重意致殷懇善啓誘後學臨晉賈氏者延公
爲塾師賈故以力田致饒貲雄數邑諸子習公
教皆循循儒者以行義稱于鄉今其冢奕奕起

爲儒門矣公與人無城府語卽吐心久與居則情款益篤處宗族鄉黨一以直諒無論親疎賢不肖咸無間言者余蚤與公相知迨附媼聯末益投契分昔歲公薄遊京國爲余留訓諸子焉邇歲里居因與公周旋不置公風儀踈宕世故不以入其懷其神氣毅然卽壯夫有不逮者日余寓山房公以札諭云偶滯下豈有良餌爲已此疾耶余意暑月常疾耳其夕回舍將訊之則聞公歿時萬曆甲戌七月十五日也悲哉悲哉

晨寓札于余時其語意筆蹟與平時無異豈自知其夕不起耶公家世多壽而公賦質且厚卽弗期頤乃耄耋可希也顧得年僅六十有一而止耶嗟嗟人之生世可槩見也已公配龍氏生子男二人長簡娶王氏次策女一人適楊良知公葬有日余乃誌公世行鑱諸羨道之石用識久遠塋域在峩嶺東南原大澗之陽公葬二親所經營新阡也銘曰胡材之良而遇則遭胡氣之龐而壽罔延惟身之否迺終窶艱惟心之亨

迺恒泰然造物豈偏可問者天有膺崇阡公神歸焉昭德在石不媿永年

壽官郇岡沈公墓誌銘

隆慶壬申十一月十一日表伯郇岡公卒距其生弘治甲寅八月某日得年七十有九此在人間世稱上壽矣然有可悲者初余祖姑歸沈氏生二子而公為長其季未室而亡公淳固敦龐亦既永于年矣乃復竟鮮胤嗣傷哉天道真不可知也公從子應豐者早孤公撫育成立與同

居處應豐亦曲盡孝敬不啻父子然當公疾篤時應豐適自遠歸居其喪余舅宮保鑑川公暨家大人為之經紀其後事甚備葬有日余乃誌公世行納諸羨道用存之不朽云公諱江字東潮姓沈氏沈氏故為河中永樂人公八世祖諱孝先者仕元為參軍提領徙猗氏子恭道遂占籍焉恭道子有曰政者還蒲居籍仍係猗氏猗氏古郇墟故公號郇岡志不忘也高祖浩曾祖鑑祖明猗庠生父廷珍號毅齋母張氏余祖姑

也公天性夷曠雖牽車服賈不切切然計贏縮當年盛志銳携巨貲遊關隴揚越間往往牟大利輒散去不復訾省末年生理漸耗或終歲屢空晏然居之亦未嘗一日戚戚于懷殆古之所謂能保其天倪者性敏多記憶弱冠失怙不得終志于學而好涉閱舟車所至必携短帙自隨爲能多通于方技小說家之言其筭數有聲于廛井間然人所亟稱者則周易課占言禍福無不立應由其衷宇寧定不爲物擾能與鬼神通

爾蒲俗婚媾論門輩公最能道其詳若遠若近子姓族系旁通博衍歷歷厖分而階列之且好稱述郡中前輩事實及異時風俗厚道疊疊可聽故余每聞公言輒慨嘆思慕雖累日若不足也公配王氏贈太子太保兵部尚書素菴公之女先妣淑人之伯姊也先公十年卒閩行周善具見舅氏鑑川公誌中繼某氏女一人適國子生張志道外孫男三人嘉蘊州學生嘉猷嘉言葬之域爲條山東麓新阡葬之期爲萬曆癸酉

二月二十一日銘曰吁嗟伯翁身今是居而心
與古爲徒賈惟其業而不與利謀豐殖若虛終
寔自如明絜物策而幽發神樞旣壽且康優游
化區胡靈根之厚而芳蔭未敷中條之陰厥壤
孔腴玄堂永寧萬禩不渝

義官南橋韓公暨配薛孺人合葬墓誌銘
友人韓君伯通將合葬其父母南橋君薛孺人
新兆旣卜迺手狀行實徵余銘于千里余覽狀
則泫然而悲不知涕之無從也嗟乎立孤之難

劇于死節在昔烈丈夫謂且然矣矧以閨閣之
孱姿遭不天之愍會而能矢志于中植義于後
是雖其身之子弱而能立猶足難焉而况育子
姓以竟厥志者乎可不謂烈與伯通者蓋南橋
公之嗣子也南橋公歿旣數歲而伯通始生薛
孺人取而鞠之備歷荼苦廿年餘矣旣有成績
而養不待焉茲可不悲與余爲弟子員也則與
伯通友因論孺人之詳而亦槩公之爲人故將
銘公夫婦而重之以悲按狀公諱玻字惟器南

橋其別號也先世楊州之寶應人始祖曰傑當
 高皇帝時以功授蒲州守禦千戶傳公高祖旭
 曾祖鑑陞蘭州衛指揮僉事鑑子深復守禦蒲
 州故迄今為蒲州人祖澤鑑次子也以蒲庠弟
 子員授儒官父霽有淳德州人稱誠齋公母郭
 氏生公兄弟凡五人公其長也公天性孝友為
 父母所鍾愛為諸弟所嚴敬雅嗜潔靜而尤好
 觀古今史籍故雖牽車服賈能以心計阜通貨
 賄而擅其贏然必以義施以廉受其儕輩信且

懷之賈遊所至北歷甘涼瓜鄯姑臧之境南涉
 江淮旅中疑取決焉爭取正焉退無復私語性
 凝重不阿人有媿媿傾狡者輒面折不能忍而
 急困拯窮若在己焉嘗入粟實邊授義官嘉靖
 某年五月二十一日卒于淮安旅邸距其生弘
 治戊申正月三日壽凡若干歲配薛孺人生員
 薛公錦之仲女也母李氏以弘治戊申十二月
 一日生孺人丰度淑閑莊凝績栗相夫子以宜
 于家事舅姑巨細必敬誠齋公夫婦內範孔嚴

諸子婦鮮當意饗殮組紉凡出孺人手者無所
疵焉處妯娌睦馭臧獲恩初南橋公計聞孺人
慟垂絕確以撫遺女事翁姑自誓母黨有欲奪
其志者百方終不易也迨伯通生遂鞠育之慈
惻勤瘁靡夙靡夜甫垂髫卽令從塾師于時伯
通之外舅李公者善教人出其門者率有顯效
孺人聞之遂手伯通涕泣詣李公教焉伯通幼
穎拔祇奉外內之訓專精淬礪聲名奕奕起比
爲弟子負卓然有逸氣遂與余輩二三同志共

學南亭離經考業朝夕亶亶孺人時更僮詞之
已則大悅其供饋之需器用之備歲且再易未
有厭焉嘉靖壬子伯通舉于鄉孺人且喜且泣
若曰吾有以復汝父于地下矣先是姻黨多謂
娶室寡給子宜從賈者至是乃皆服孺人之知
子也嘉靖乙卯十二月十三日秦晉地大震孺
人遂逝距其生得壽六十有八孺人初生二男
皆不育嗣子一人楫卽伯通舉人博文而有奇
思將以丕顯于時以衍公與孺人之隱烈者未

究也娶傅氏引禮舍人弘毅之女繼娶祁氏宛
州府同知天敘之女女一人適胡邦靖初公之
旅歿也公弟瓚自蒲馳赴淮扶其櫬以歸至已
酉七月葬韓楊祖塋之次迨孺人歿伯通方赴
試南宮聞變奔歸更棺而殮之權殯東宅越五
載爲今歲庚申宅兆既定日月叶吉遂遷公柩
新域啓孺人之殯奉而合祔焉禮也銘曰韓系
自周氏于大邦代析而蕃有育淮江矯矯人雄
荷戈從龍奠是世勛于河之東錫胤載烈惟德

之揭修輓經涂中道而絕婉婉淑人矢心皦日
抱哺其嬰茹荼若蜜能言而教任冠而室嘗禴
有承我心斯畢旣孚而羽橫翔天路神道可徵
中閫作度立孤寔難矧亢其宗我銘玄宅侈于
管彤

處士李公仲節暨配孺人張氏墓誌銘

李處士公之逝也久矣葬未有銘洎嘉靖三十
二年其配孺人張氏卒子邦憲輩將以某月某
日啓處士公之壙而合葬焉迺走狀張子以墓

銘請公之冢孫女張子之仲弟婦也屬在姻戚不容以固陋辭按狀公諱季字仲節世爲蒲之大通里人曾祖福祖剛考恭妣張氏寔于成化甲午三月二十六日生公公生而醇厚雅尚朴實孝愛慈良出於天性妣張孺人早卒公方幼稚卽哀毀不能自存年益長父命商于兗豫之間劑量盈縮善與時輕重其產遂饒事父暨繼母張孺人悉得其歡心靡有間言其後父母歿有叔父母者有子而不能家公養之如父母孝

敬委曲百端而不得其欲蓋叔父母溺愛而私不尤其子不才而謂猶子之養當然也故每事必拘換之囂嗽之人咸不能堪公曰叔父母無他此內忿其子之不瞻耳遂以所有盡付之鄉鄰有議之者公曰吾子而才也奚有於此如不才此亦奚濟至今人稱其德量云配孺人張氏明教廂處士俸之女也柔惠而慈其事處士公也敬戒必至終身有禮事舅姑則又勤孝篤誠飲食必潔晨昏必省處士公遠商家或不給每

出奩具以奉甘旨于是舅姑亟稱之曰賢蓋得于張氏之家教者為多也余不及見處士公而及見孺人孺人識度弘闊遇事綽有條理議論昂昂然端正不為依隨其治家也嚴而有恩諸子婦咸憚之中庭無譁撫諸孫恩愛甚至始余弟之議婚也孺人之家方殷盛里俗率視人家之豐約以為姻婭孺人曰嫁女擇婚耳多貲何為此其識見頗不甚偉也哉蒲土當秦晉水陸之衝賦役繁重即丈夫之悞閭者弗能支也孺

人於諸子遠遊以一婦人而周旋其門戶人莫能欺焉莫能侵漁焉幼婦童孫前後恃之且資識明敏鞠育既眾遂諳于醫理凡中外幼穉有病咸請孺人視之多有異效他如飲食醯醢纂組絲枲亦皆精到于所謂婦德者孺人無不備之余得於目覩心竊羨焉客冬余別孺人于家時尚無恙也歷夏秋而聞孺人之病入冬而遂聞孺人之訃嗚呼悲哉孺人氣厚而體實自幼未嘗事藥餌年雖高其氣尚未衰也此宜其耄

何產堂集 卷之二十一 三十三
期未艾而遽若此嗚呼真可悲矣子三人長邦
憲娶高氏次邦寧娶王氏次邦富娶衛氏女一
適張邦吉孫男四子華邦憲出子芳子茂子蕃
邦富出俱幼孫女二一適余弟生員四端一聘
薛朝紳孺人生于成化辛丑十一月十五日距
其卒得壽七十有三處士公卒嘉靖丙申二月
二十四日距其生得壽六十有三公卒後八年
而余弟婚于李氏又十年而孺人亡故張子之
知孺人也詳銘曰蒲有李氏肇自宋元篤生哲

人矯翰雲騫婉婉淑女作配君子靜好相成德
音不已迺既有子亦既有孫庭闈奕奕相映玫
現惟山之陽惟澗之左雙璧永藏萬年孔安

處士東山范公暨配孺人王氏柴氏墓誌

銘

公諱世達字希哲別號東山蒲之豐樂里人也
先世居城東文學莊至公高祖榮始遷白坡下
北閭郭之地族姓蕃衍至今稱閭郭范氏云曾
祖斌祖清父鸞母甯氏公家世以農商爲業公

幼服賈四方綽有心計倜儻負大志視行輩逐
逐然競錐刀之末者不屑也令甲權淮浙鹺利
以佐國計凡商人占淮浙鹽者悉令輸粟甘肅
寧夏等邊給通關領引而守支于淮浙謂之飛
輓然自開中以及支給曠日延久且出入戎馬
間有絳埃之警而鹽利又時有朏胸是以商人
不樂與官爲市公獨曰此可居也遂歷關隴度
臯蘭往來張掖酒泉姑臧之境察道里險易計
儲侍蓄散盈縮以時廢居而低昂其趨舍每發

必奇中徃徃牟大利然又必循理守法如其非
分非義不以一毫苟取于人于是都御史陳公
撫河西甚加禮遇而諸將軍官咸樂與之納交
商中凡有校不以讞官公一言卽忻然兩解其
信義之孚人者明也久而貲益巨占良田數百
畝積緡錢以萬計性雅素不爲衣服輿馬之飾
而恤匱拯急如恐弗及三原人陳海者貧而坐
法公憐其旅困爲之出貲贖臯海德之未幾忽
竊公之重貲亡去人皆尤之公曰此人吾與之

仙履堂集 卷之二十一 三十三
恩厚偶利迷爾稍寤當自來已而果然于是衆
大服之嗟乎此豈與尋常者論尺寸哉嘉靖丁
巳九月八日以疾卒于旅距其生弘治戊午九
月九日得壽六十公初配王氏孝敬勤儉內外
無間言生弘治己未正月二十七日卒嘉靖乙
未三月七日得年三十有七繼配柴氏嚴正有
則育諸子如巳出生正德壬申二月二日卒嘉
靖戊午正月二十五日得壽四十有七子男二
人良志吏部聽選官娶齊氏繼衛氏周氏次良

吉省祭官娶任氏何氏女二人一適國子生寧
仲智一適臨洮府同知歷山馮公子濂孫男一
守謙孫女一字余弟四象良吉出王孺人先葬
祖塋良志等爲公卜新兆峨嵋之麓擇今歲戊
午某月某日奉公及柴孺人柩併啓王孺人柩
合葬焉禮也謂公之履歷不可無誌迺屬余誌
而銘之銘曰矢義靡遷風被閭廛倚惟公之哲
今仲方是肩貨賄阜通化瘠爲豐倚惟公之猷
今卓鄭爭雄順正是止相爾終始倚惟公之配

今後先齊美負坂之岡河流湯湯爰啓玄堂我
銘載揚于德有光萬年不忘

嶺岡王君墓誌銘

萬曆癸酉十月一日嶺岡王君卒距其生嘉靖
乙丑八月十五日得年僅四十有五其從子三
益方卒業太學聞君訃則奔歸持其喪三益者
君仲兄誨子也誨久賈于外三益方九歲卽失
母君憐而子育之知學爲之闢塾延師旣冠則
爲之授室鞠撫甚至三益亦以父事君不啻所

生也當君疾篤泣語其伯姊云吾不起必以三
益嗣俾承吾業奉吾妻吾妻方娠幸男也則異
日以吾產中分之言訖而歿三益旣歸皇皇營
葬事周爰卜兆得地于蒼龍谷西北王莊之原
安厝有日乃持君妹丈庠友史君載誼所爲君
狀匄匍徵銘于余君倜儻不羈好從賢士大夫
游郡縉紳先生多與君交者余妻亦君兄弟行
也以姻婭故顧特與余篤余見君神宇壯毅不
虞其中歲逝也聞三益之請則惻然遂不辭而

銘之按狀君諱從詒字允正別號峭岡世爲蒲
之大通廂人曾祖彪祖清父容太學生有淳德
人稱爲省躬公母張氏君幼而警慧父母特鍾
愛之天性孝友方省躬公夫婦之違養也君年
甚少比長常痛恨歲時享祀必竭誠盡物以爲
常君諸昆季俱從仲父服賈滄冀率數歲一視
家一切家政君皆獨力任之蒲俗嫻黨禮問徃
來頗繁而徃賦視他郡邑爲劇君族旣夥又以
貲力雄閭右官私諸務最爲叢雜君幹濟優裕

率不勞而事舉內外小大無不悅之州東五姓
湖孺有祖遺田一區百餘年第穢不治君以其
餘力墾闢之畫町疇分阡陌末年歲入至五倍
其初益又能重本業如此君儀狀甚偉美髯豐
頤方腹修幹而性好佳馬每汲汲求之百金不
恡廐恒有名畜焉嘗北視諸昆季過燕趙郡國
市人無不聚觀之者善飲好客酒酣輒巨觥縱
橫趣致益跌宕有古豪達風然好義負氣遇人
急困則調之不復計纖細利至于意有不合卽

頽然見之辭色不能屈也歿之歲其春嘗墮馬傷甚余往唁焉則曰祿命家謂我今茲歲行不吉邁斯患其殆免夫余寬之曰免矣乃竟不免信命哉信命哉君初配羅氏生于嘉靖戊戌七月二十日卒于嘉靖乙卯十二月十三日得年一十有八繼張氏凡生四子俱不育今有娠女三人一適庠生何汝中封監察御史尚仁子二幼銘曰心惟義矣而迹則塵業惟賈矣而本則有度胡其宏而胤靡延氣胡其充而不永年匪

命固然其孰使然

處士東溪徐公暨配張孺人合葬墓誌銘

初東溪公歿子經爲卜兆條山之陰葬焉于時未有銘蓋有待也不數歲經罹地震之變張孺人晝夜哭未暮心傷死迄今歲辛酉六稔矣子綸擇于四月某日合葬孺人公窆迺徵銘于維嗚呼吾又何忍銘公也自維爲諸生與公子經遊于時公方壯健意氣忼慨其諸稱論甚跌宕因得以闚其中之所藏公潔方好義人也早歲

失恃事繼母以孝稱長而善治產貿遷南北往來秦豫吳會之境者歲必再以故其業滋豐公祇奉諸父雖牟羨至不訾而終始無他腸居貨四十餘年未嘗陰以錙銖自封殖比與諸父析產緡錢且益耗其贏無幾而公又乏私蓄遂大困然公未嘗有怨恨也鄉人義焉方未析產時公嘗挾貲南泛選寇江中諸賈人遭剽劇公適有天幸免焉于是家衆滋生心有端矣或導公托寇稍掩其貲者公曰若然則吾寇也竟不爲

毫髮欺公季父山泉公嘗爲予亟稱如此子經幼開敏公教以義方爲之延師授業故經弱冠遊郡庠予甚敬之迺不究厥施橫罹大變而死豈非命哉張孺人慈惠而能家公旅遊率在外久而孺人修中饋畢婚嫁綜藝獲交姻黨無所紕漏門戶肅如也經歿哭之慟曰吾兒孝子也寧棄我比病困猶懵懵如夢語曰經來經來嗚呼茲可謂至悲也昔予往來公門屬公家方盛旣拜公聆言論亦時獲謁孺人于堂然經與維

契特篤公宅東有精舍維歲居其中者半焉不知其非家也曾未十年而公父子夫婦相繼殞謝念昔遊殆異世云故維惜經之志不就而深有慟于公也而又不能不爲公銘按狀公諱昂字時望元賢徐伯珠後裔始祖徐德洪武中占籍蒲永豐廂高祖珍曾祖通祖鎰父憲母師氏公生弘治戊午九月十三日卒嘉靖癸丑六月初八日得年五十有六孺人處士義之女生正德戊辰二月初八日卒嘉靖丙辰八月十六日

得年四十有九子男二人經州庠生娶張氏繼李氏卒綸娶沈氏女一人適洪繼芳孫男女凡幾人綸出綸能幹蠱產裕于公存時銘曰噫嘻惟公造產自躬而不處其盈粵秀于子而不享其成將人作鑿曾天靡平惟中條之曲有鬱佳城永歸雙壁旣固且寧

處士山泉徐公暨配王孺人合葬墓誌銘
公諱杲字宗陽姓徐氏別號山泉相傳爲徐萬戶後裔元時有伯珠者以真外稱爲河中太守

高祖得當洪武初占籍蒲之永豐廟曾祖珍祖通父鎰以齒德爲鄉飲賓母張氏生四子公其季也公天性孝友爲父母所鍾愛恂恂承志未嘗有違言家世業商父母慮其不任跋涉公毅然以四方事自奮乃遊金陵沂吳越西走隴益居貨岐山池陽之域雍涼諸郡稍稍遍歷焉廢居通滯能矚時之高下而牟其贏利用能豐殖厥產以慰其父母之心公雖業筭緡然心實博愛好義與人交敦重信義不爭尺寸利其周急

恤病洽于媼黨凡有喪不能舉者助之葬有所賁而不能償者折其券故終其身與人無忤有餘愛焉性喜儒術常禮重儒者余亡友中軒生經者公之諸孫也中軒生業儒而有至行公愛之甚于孫中軒生之事公尤極孝敬公嘗病瘍中軒生憂于色選醫諏方手自製煨藥餌朝夕依侍不去側旣而病良已余恒見其祖孫間訢訢如也配王氏鄉賓世獻女婦道甚修有聲閭巷間先公卒繼配楊氏亦名家女公生於弘治

仙舟堂集 卷之二十八
三十三
戊午十二月八日卒於嘉靖乙卯十二月十三日得年五十有八王孺人生于弘治辛酉七月十日卒於嘉靖壬午五月二十一日得年二十有二子男一人禮王出娶孟氏女三人長適王友諒次適丁成身楊出孫男五約綬統俱蚤夭綱州庠生娶雷氏繼娶陳氏孫女一適兵部武選司員外郎王承休余昔因中軒生識公雅重公長者初公歿余時自史局丁先妣艱里居禮謀葬公徵余爲銘誌迄今二紀餘矣禮乃始克

襄公葬事介武選執余原稿來以鑿石請余覽之惘然追念今昔因爲續增其子姓之當志者貽之其銘曰家以恩聯鄉以義親居貨不黷秉德是珍牽車承志南北其軌人孚其心異區均美樸貌長裾踉踉若儒施于孫子惟善之趨公歸胡鄉有封若堂千年永固世載其祥

叔父竹川府君暨配孺人李氏左氏合葬

墓誌銘

叔父諱遐齡字伯鶴竹川其別號也遇例授太

醫院吏目以正德乙亥二月初二日生萬曆庚辰九月二十二日卒享壽六十有六叔父之卒也維方參與政樞偕仲弟後府都事四端叔父冢子國子生四輔咸在都大人以書來計且以速葬告維未能行迺命二弟星馳西旋視殯事因含涕爲銘誌付之俾刻之羨道之石用徵于永世云按張氏之先世居解鹺池之南有諱思誠者自勝國時徙蒲明與其子友直遂占籍通化坊傳仲亨克亮秀寧七葉而及大父贈少傅

首陽府君誼配大母贈一品夫人解氏是生二子大人封柱國少傅崑川公及叔父也叔父生始逾朞而大父棄養大母解撫之極慈不欲勞以學兼不欲其服賈遠遊年且弱冠未嘗一日離左右也迨有室始商游吳越間于時年幼氣銳旣連不獲牟大利乃南歷五嶺抵番禺往來豫章建業諸大都會凡六七年而貲益耗窘而歸則大母已沒世矣初大父病篤指叔父謂宗戚曰此兒異日憶父與談夢何異時大人年十

何處空集 卷之二十八
三四
餘慟之後大母嘗嬰危疾謂大人曰吾死不恨
所慮爾弟不能自立耳大人每念父母言輒噓
唏不自禁故待叔父極友愛而叔父亦事兄最
謹叔父性坦率無城府意有所拂輒勃然形于
詞色俄而釋去故平生無宿怨雖幼事貿遷而
視財利甚輕不屑屑較錙銖諸所與行化歷久
不忘德其寬厚無論所與也比大人以故市莊
爲叔父業每歲夏秋叔父常居莊視耕穫故市
人多樂就之者莊南王官谷東崖有高寺一區

未審創自何時規制宏鉅然歲久僧窳臥佛像
襍莽間欹棟相與撐拒不任頽簷壞壁甚矣叔
父過之惋惜乃鳩匠飭材不靳數百金之費一
舉而新之雄偉靚麗加于初制已復繕器具墾
田畝稍稍招還僧徒爲東山增一名勝云叔父
生平少疾偶以撲跌小青宛轉患風眩久之遂
成心恙歲餘矣卒之前旬中日忽神情清朗若
沉痾頓祛者大人方深幸之迺一夕疾作遂不
起悲哉叔父初配孺人李氏處士鳳朝之女生

何養宣集 卷之二十八 三十三
于正德丁丑十一月二十一日卒于嘉靖戊戌
七月十八日得年二十有二淑德無出繼左氏
處士錡之女生于嘉靖丙戌十二月十九日卒
于隆慶庚午十一月十八日得年四十有五壺
儀甚修能持其家生三子四輔國子生四極四
德又側室出一子四仲繼梁氏生二子四科四
始女四孫男二才徵文徵四輔出初左孺人歿
業已營壙祔殯首陽新兆之次至是啓壙奉叔
父并遷李孺人柩合葬焉姪子四維謹誌其生

卒世行如左而系之以銘銘曰惟叔考祖所憐
坦不陂義問宣兄弟宜胤緒延越雙淑克媿賢
原膺膺崇者阡神永藏衍慶綿銘貞石千萬年

明威將軍龍虎衛指揮僉事三弟子淑墓

誌銘

嗚呼天之降剖我家何若是慘耶昨歲癸未季
春先少師公棄諸孤于時余叨總揆寓都去親
舍二千里而遙二弟五弟咸染疲憎臥不能興
惟三弟夙夜吾親左右襲含殯殮盡志盡物靡

修齋堂集 卷之三十六 三百十四
不致其誠信余兄弟終天靡極之慟無分遠邇
然所無憾于附棺者則三弟是賴耳先少師違
養之七日而五弟歿越三月而繼妣胡氏隨逝
迨甲申初改歲而三弟復不祿矣蓋未匝一暮
而愍凶四罹焉嗚呼天之降割我家何若是酷
耶悲哉慟哉余與二弟旣以仲春爲先考妣安
厝敕建新塋遂消期季秋啓三弟殯而祔葬于
兆次焉余傷弟拮据成家未享一日之逸又不
忍其生平之善行泯泯也廼披淚誌而銘之弟

諱四教字子淑別號歷磐張氏先世解梁人勝
國時諱思誠者自鹽澤之南陂遷蒲是爲蒲之
始祖子友直遂占籍通化坊傳仲亨克亮以及
高祖彥實府君琇曾祖孟儒府君寧祖守正府
君誼生先考誥封少師兼太子太師吏部尚書
中極殿大學士嶺川府君允齡曾祖祖咸誥贈
如先考封云先妣累封一品夫人王氏弟生而
豐頤廣腹體格整厚神氣充溢眉目間迥與凡
兒異性和易可親不惟親長愛憐之卽童儕亦

樂與之遊終日無誼競年僅十六卽服賈遠遊
歷汴泗涉江淮南及姑蘇吳興之境諸所經紀
廢居咸出人意表其器度凝重絕無少年子矜
溢態旅中無少長咸加敬愛一泉馮公遂許以
女字之弟幼年飲酒不能消勺至是尊長有強
之飲者不敢辭衆譁然謂其能飲觥籌交錯終
席不爲苦自是後凡有飲宴輒以善飲詘其一
座中斯亦異矣已而從先君居業滄瀛間識量
益宏達綜計精確不屑屑較錙銖每年羨于人

所不取尤精九章筭術凡方田粟布勾股商分
等法屢中有白首不得肯綮者弟皆按籍妙解
不由師授旅黨或財賄分合糾紛難敘者率請
弟爲決莫不犁然兩解彼此稱平焉癸丑余登
第後迎先君養京邸遂悉以生計付弟是時家
用益浩穰中更家鄉地變滄鹺復壅滯弟極力
周旋用能不至困乏營給中外以慰先君之心
然滄蒲相去千餘里利鞅所羈率數歲不獲一
歸壯弟未嗣余諗之先君乃移弟孥天津以居

傳齋先生集 卷之二十一 三十一
時嘉靖己未歲也弟治業滋久諳于東方鹺利源委分布調度具有操縱末年業用大裕不啻十賠其初乃其襟度曠達樂施好義當其意氣所激卽揮置千金不顧視旅中齷齪計刀錐者不侔也每歲時候余都中談及所有事其言度材任人相時應機之畧井井然咸有當于政理余甚惜以弟之才具而終身屢井間也會有工部例乃入貲授龍虎衛指揮僉事弟雅有離俗高致頗留心鍊氣養神之術時從方外人遊嘗

告余曰人之生世貴適其性情日逐逐市囂中何爲者弟將西歸鄉園奉親暇則拉朋舊縱情山水間一洗胸中俗累豈不快與余時有意丐閒聞之不覺喟然太息萬曆辛巳弟遂携孥歸蓋自己未至是二十餘年子女皆東產遂皆作東人音云親舊聞弟歸喜相慶慰往來讌會蓋終歲不絕乃爲子女理婚嫁尋奉先君命更繕宅第甫畢工而先君棄養矣悲慟勤勞見者感動余之聞先訃奔歸也中途患腋癰比抵舍庭

修齋集卷之三十一
三十一
瘠失形氣息僅屬弟憂形于色朝夕扶慰甚至
方相與總總治先人墓事惟日不足嗚呼詎憶
弟竟不及期而先逝耶悲哉悲哉弟秉受素壯
自幼寡疾病四旬後常感時疾勞復至再元氣
雖虧損不復然精健猶視余倍之商遊既倦擬
歸息于家迺變故相仍益鞅掌牽世累性謙謹
好禮不欲有踈節于鄉故吉凶慶弔遠近皆躬
致之由是心與身兩不自適神用漸耗入冬余
見弟色不澤慮之強之省事而弟心不能已也

歲暮弟卧疾經旬初甚困有瘳矣會舉五弟喪
欲出送衆強止之則撫榻大哭疾遂革嗚呼果
命也耶果非命也耶以弟之孝友仁恕積德不
懈而竟止是耶數月來弟每與余商確先人既
歿所欲爲將來門戶計宏達周至并其意向諸
所規建磊磊皆閎鉅其志趣軒舉絕無偷語不
似臨末景人而咄啐至此故懵懵謂弟未可死
幾欲問天而靡從也悲哉弟生嘉靖庚寅十一
月初十日卒萬曆甲申正月五日得壽五十有

五配馮氏子男一人善徵娶辛氏女一人適郡
庠生郭里墓之日為九月十七銘曰冲思耽玄
堅束于世緣牽車窮年成功未息肩德則多而
福應則鮮受則厚而算則弗延難詰者天孰測
其然爰闢重泉從考新阡永世有辭貞石是鐫

太學生五弟子易墓誌銘

嗚呼先妣贈一品夫人凡生七男子悉自乳弟
行在五自余至弟每間歲一生前後僅十年耳
于時遭家中否先妣隻身操井曰上奉孀姑下

提携捧負諸稚鞠哺訓育浣故緝敝每質明興
中夜寢以為常七子中其最少二人早殤及五
人者皆壯有室家日嚮裕而先妣不待養乃余
兄弟終身永恨然幸先考封少師府君在堂為
子若孫依恃耳此四弟不祿先少師哭之慟今
春蒲郡大疫闔室染焉先少師遂棄諸孤越七
日弟隨逝嗚呼悲哉慟哉家門之禍尚忍言哉
先妣夫人拮据育諸子今惟余在長三人在耳
歲律且易奉勅建先少師塋兆未竣卜以十二

月二十五日先治弟殯余乃爲誌其墓中之石
用徵久遠感憶今昔不覺心神之摧越也悲哉
弟諱四象字子易號松磐張氏先世蓋居解梁
鹽澤之南其徙而之蒲則自八世祖思誠始傳
友直仲亨克亮以及高祖彥實府君諱琇曾祖
孟儒竹君諱寧祖守正府君諱誼先考嶠川府
君諱允齡自曾祖而下三世皆誥封少師兼太
子太師吏部尚書中極殿大學士先妣王氏贈
一品夫人弟生而穎茂言動嬉笑咸機警與常

兒異授之章句輒能誦且強記時先考方服勤
四方余兄弟咸在塾先妣稍稍以家務付弟理
卽釐然有條緒不啻若成人者遂令輟學業治
生計焉比弟年益長家務益浩穰弟心時時在
舉子業迄不得專精攻治嘗爲弟子負尋援例
卒業成均心歆然以爲恨也性喜博涉凡百家
言一見卽能語其大意好爲楷書方正適媚得
二沈餘韻間操觚爲詩頗能自道其胸中意出
且遇事多能不由于學素未治田業及先少師

何陋室集 卷之二十一 四三
建孟盟莊弟調度耕蓄斟量畊畝卽老農圃有
不逮者至于禾稼之豐瘠果蔬之登耗類能逆
覩而預計之比獲不失升勺尤善奕蓋得之天
性其襟度夷曠飲酒至半餘不亂當其意興所
至觥籌交錯或至夜分衆酪酏不支而獨高談
自如樂易無崖岸所與交游最廣友誼最篤人
有不給或偶值意外困阨惻然赴而賑之惟其
力不計也春初弟貽書於余謂將以先少師壽
誕後北來候余余闢館後之俄而聞先君訃且

聞弟病及家人得弟凶問以余毀頓故秘不聞
也歸及湖城始聞之嗚呼慟哉弟氣稟素壯且
少余十年余年來自覺早衰方賴弟顧余餘齒
而弟乃遽至是耶悲哉弟生于嘉靖乙未十一
月二十日卒于萬曆癸未三月二十九日享年
四十有九初聘王氏生于嘉靖癸卯十一月初
七日卒于嘉靖乙卯十二月十三日得年一十
有三娶范氏生于嘉靖丙午十二月二十九日
卒于萬曆丁丑正月二十五日得年三十有二

繼娶景氏子男一麟徵女一初范氏歿塋祖塋
弟爲治壙甚精茲以時月之吉啓壙合塋併迎
王氏柩自王塋來祔焉禮也銘曰賦之慧也克
其量何藝不研受之龐也善其養何算不延胡
造物者顧斯其後不究其先曠達世緣德施澶
漫從考而還祔祖斯阡旣安永堅于千萬年

條麓堂集卷之二十八 終

